

0.0.1 asubhānupassīsuttam

1. vuttaṃ hetam bhagavatā. vuttamarahatā'ti me suttaṃ:
2. asubhānupassī bhikkhave kāyasmim viharatha. ānāpānasati ca vo ajjhataṃ parimukhaṃ sūpaṭṭhitā hotu. sabbasaṅkhāresu aniccānupassino viharatha.
3. asubhānupassīnaṃ bhikkhave kāyasmim viharataṃ yo subhāya dhātuyā rāgānusayo so pahīyati. ānāpānasatiyā ajjhataṃ parimukhaṃ sūpaṭṭhitāya ye bāhirā vitakkāsayā vighātapakkhikā te na honti. sabbasaṅkhāresu aniccānupassīnaṃ viharataṃ yā avijjā sā pahīyati. yā vijjā sā uppajjati'ti.
4. etamatthaṃ bhagavā avoca. tatthetaṃ iti vuccati:

"asubhānupassī kāyasmim,
 ānāpāne patissato;
 sabbasaṅkhārasamathaṃ,
 passaṃ ātāpi sabbadā.

sa ve sammaddaso bhikkhu,
 yato tattha vimuccati;
 abhiññāvosito santo,
 sa ve yogātigo muni"ti.
5. ayampi attho vutto bhagavatā. iti me sutanti.